



Minggu, 14 Agustus 2022
Ogen: 1 Korinti 9:24-27



"Disiplin Latihan"



Latihan seh kal perluna i bas kegeluhen. Kesuksesan sekalak i bas bidangna masing-masing erkiteken latihan rutin ras disiplin. Umpamana : sekalak atlet senam, renang, atlet lari, tolak peluru entah pe binaragawan perlu melala latihan gelahna jadi atlet si berprestasi. Sekalak si lit bakat rendena, perlu latihan vocal gelahna reh jilena dengen iangkana tehnik rende. Anak sekolah si ersura-sura gelah lulus dengen berprestasi pe perlu melala latihan i bas ngerjaken soal-soal. Sekali jadi pernah aku nonton konser musik, janah ibereken kesempatan guna jumpa/wawancara ras sekalak pemain pianona. I bas ujung percakapan kami kusungkun ia kerna kelihaianna mainken piano e, janah sederhana kal jababna, "mbue latihan ras disiplin." Intina, guna ndatken keberhasilen perlu latihan si payo dengen disiplin.

I bas 1 Korinti 9:24-27 si jadi bahan paksa tenengta pe ituliskan, "kerina kalak si ikut i bas perlumban e arus ia lebe ngikuti latihan si mberat." Latihan e idalankenna guna ndatken tanda kemenangan. Latihan si disiplin la terjeng iperlukan i bas dunia atlet, tapi latihan pertendin pe perlu kal kedisiplinen, erkiteken persoalen kegeluhen si man hadapen labo reh nahangna tapi persoalen e reh beratna. E maka perlu kal latihan petendin gelahna ula bene kinitekennta. Sabapna adi megati si latih pertendinta, mberat pe persoalen e jadina menahang.

Anak sekolah, adi kin atena lulus dengen naik ku tahapen lanjutan, arus ia ngikuti ujian rikutken tahapan si lit. Adi sura-suranta naik kelas i bas persoalen geluh enda perlu kita melala latihan petendin si erbahanca kinitekennta paguh dengen ukurta pe reh jorena. Rasul Paulus nawarken man banta, guna seh ku garis akhir e perlu ilitken latihan si mberat, kedisiplinen dengen tertuju ku bas sada tujun saja. Marilah si latih fisik dengen pertendinnta alu disiplin guna ndatken rudang-rudang kegeluhen si la ermasap-masap.